

# U Castagnu Innamuratu

O cusì bella donna venuta à ripusà  
Nuda sottu à le mio fronde  
In la mio ombra pagna era dolce à carezzà  
è s'hè intesa rinfrescà.

Fù cusì chì l'amore entrò  
In lu mio suchju di poveru castagnò  
è per dì la so maestà  
L'acelli tutti si sò messi à chjuchjulà.

Hè la dea di l'amore  
È cun ella la mio vita vogliu fà  
S'ella ùn passa la fiamma  
Li vogliu fà onore  
è ben vestutu mi truverà.

U sole ch'impiumbava a purtava versu mè  
è li so ricunniscente  
In lu scuchju sentia a so pelle trizinà  
è lu so core pichjà.

Tengu à dì chì stu tempu fù  
Una delizia di passione è di virtù  
Ma si sà tuttu hè per finì  
Intenneriti vissemu l'estate smarì.

Maraviglia ella si chjama  
Chì à la vita un sensu sà dà  
Di la so cumpagnia  
N'aghju sempre la brama  
Ma sò chì un ghjornu rivenerà.

Avà soffia u friscone prontu à tuttu ruvinà  
D'oru si carca a natura  
Mentre chì lu mio pannu fronda à fronda si ne và  
U vestitone metterà.

Eo quì cundannatu à stà  
L'inguernu sanu insischitu à aspettà  
Da culà pò solu mandà  
I mille basgi chì lu ventu sà purtà.

Ma à tempu à lu veranu  
U mio custume novu, degnu d'ella, sbuccerà  
Per pudella aggruttà  
Le branche spaghjeraghju  
è l'incantesimu turnerà.